

Uffants da spirituals catolics cumenzan a raquintar

Ina homepage dat la pussaivladad da barattar experientschas

DA CLAUDIA CADRUVI / ANR

■ **«Priesterkind – na und?» Uschia è il titel da la pagina d'internet che duas figlias da spirituals catolics han avert. La finamira è che pertutgads pon sa discurrer.** Datti blers uffants da spirituals catolics u datti mo paucs? Questa dumonda na po nagin respunder. Pertge ils uffants dals spirituals catolics n'èn registrads nagliur. Ma forse n'èsi gnanca impurtant da savair cifras. Pli impurtant è: Pertge vegn la tematica anc adina zuppentada da la baselgia uffiziala? Pertge è la baselgia uschè crudavla cun la figlia-lanza dals agens spirituals che s'engaschan e brahan per la baselgia?

Forsa èsi fin uss era stà fitg simpel da snegar il problem. Las unfrendas – las figlias ed ils figls – èn fin stads prompts da taschair. Ina visita tar www.priesterkind.com mussa tranter auter, tge conse-

quenzas ch'i ha per ils uffants, sch'els ston adina taschair.

«Situaziuns grotescas»

Per dunnas da prers u paders datti gruppas d'agid. Ma il problem dals uffants vegn adina marginalisà. «Donn, pertge nus cartain, ch'uffants da spirituals fissan fitg leds da pudair sa discurrer cun auters pertutgads», stà scrit sin la pagina da bainvegna.

Sut il chavazzin «actual» chattan ins in rapport d'ina dunna che scriva: «Cura che la halla da Bad Reichenhall è crudada ensemen ils 2 da schaner 2006 è era mort in uffant d'in spiritual en uffizi. Il spiritual na dastga uffizialmain betg mussar sia tristezza... El aveva fitg gugent ses uffant... Tut ils spirituals da la regiun san quai, ma i sto restar in secret. Tge situaziuns grotescas che la vita en la baselgia po stgaffir!»

Tge scriver en il concept sur dal bab?

«Nus essan uffants da spirituals.» Questa construcziun tuna simpla, ma ella è cumbinada cun manzegas, cun il sentiment da trasora stuair sa zuppar insatge, cun gritta, dolor, izolaziun e solitariadad, stà scrit sin la pagina d'internet.

Mintgatant vegnia discurrì davosvi davart quai che na dastgass betg esser. Ma uffizialmain vegn taschè. Il mender saja ch'era ils uffants sezs taschian: «Ord turpetg, ord tema da far donn a la famiglia, al bab, u simplamain perquai ch'els han gia da pitschen ensi emprendì nagut auter.»

Uffants da spirituals hajan problems ch'insatgi d'ordaiser na possia gnanca chapir, per exempel la tema da stuair declearar en in concept da scola tge ch'il bab lavuria. Qua vegnia l'uffant en il dilemma: «Ti na dastgas betg dir manzegas!» e «Ti na dastgas betg dir la vardad!»

Fauss resguard

Las figlias ed ils figls creschids enconuschan puspè tut auters problems. «Fin uss n'hai jau gè naginas relaziuns, ed jau na sun era betg segira, sch'jau pudess viver ensemen cun in um», scriva ina pertutgada. Tar ils agens geniturs na haja ella mai emprendì d'enconuscher in partenadi normal. «Tut chapitava – sche in summa – dascus e davos escha serrada.» Avant diesch onns ha questa dunna cumenzà a discurrer davart sia derivanza. «Blers enconuschevan, davosvi tuttina gia l'istorgia da mia famiglia. E mes novs amis duevan savair la chaussa avant ch'els intervegnivan tut dad auters.»

Fin uss na saja ella mai s'enriclada d'avair discurrì avertamain da la chaussa. «Il cuntrari, ins sa senta propi liberà, sch'ins na vul betg pli dir manzegas ord spir fauss resguard.»

Esser rentà vid la baselgia che refusa ins

Problematic è era, sche uffants da spirituals èn liads – entras lur educaziun e lur cardientscha – vid la baselgia catolica. Quai chaschuna anc pli gronds problems.

Ina pertutgada raquinta: «Dacurt hai jau intervegnì dad enconuscher, ch'jau sun vegnida battegiada pir cun sis onns, perquai che nagin spiritual da la regiun era prompt da battegiar mai.» La medema dunna scriva: «Jau ma sent liada cun la baselgia e ma sent da chasa là.» Ella ha il giasch che la baselgia na dat betg pli il sentiment ad ella da betg esser giaschada.

Litteratura:

Annette Bruhns e Peter Wensierski: «Töchter und Söhne von Priestern erzählen ihr Schicksal». Editur «Spiegel». Hamburg.

Karin Jäckel: «Sag keinem, wer dein Vater ist!» Chasa editura «Piper». Minca.